

摘藻堂四庫全書薈要

集部

欽定四庫全書薈要

集部

元文類卷十九

六至

詳校官候選知縣

臣吳甫華



欽定四庫全書薈要卷二萬九十九

元文類卷十六

元 蘇天爵 編

東昌路賀平宋表

徐世隆

聖人之兵仁而威無遠不服天下之勢離必合有險即
平方期四海之會同豈許一江之限隔捷書屢至慶頌
交馳欽惟皇帝陛下至德體元中華開統美化既東西

之被兼愛豈南北之分初建文臣播告方國昭示包荒
之量絕無陵弱之心弗圖島夷輒拘使節誘納我叛將
盜據我厯城雖就鯨鯢之誅尚遺蜂蠆之毒蠢爾三苗
之弗率命予羣后之徂征一鼓而定荆襄再駕而降鄂
岳嶄黃面縛江漢心歸鐵瓮之堅城已摧金陵之王氣
何待楚地六千里不勞秦將之增兵錢塘十萬家坐見
吳王之納土僞將悉朝於闕下幼君遐竄於海中方知
恃險而亡應悔求和之晚茲雖天意實出聖籌歷觀往

古混一之難未有今日飛渡之易臣某等叨居牧寄喜
聽凱音矧曾充載筆之臣尤當述集勲之事駿奔効命
正海內一家之時虎拜揚休上天子萬年之壽

車駕班師賀表

中統元年九月為
真定康宣撫作

李冶

臣某等言伏為逆黨悉平車駕迴鑾者黃鉞耀威果凶
徒之一掃翠華旋軫遽明詔之再頒率土皆臣普天同
慶伏以周之熙朝而造管叔武庚之役漢之盛世而行
淮南濟北之誅事豈樂為兵非得已屬者逆屬相煽狂

童恣行潛包禍心構成內難惟聖人必欲去害斯天子

所以有征爰興問罪之師庸示安民之勇靈旗順指醜

類畢潛衣暫試於一戎月連飛於三捷春生秋殺立化

何私天動星迴鴻鈞自幹宗祧鞏固永孚無疆之休日

月貞明定為羣目之用此蓋皇帝陛下運膺千載道貫

九皇雄斷電馳廟謨洞徹既多算以勝少算況至仁而

伐不仁是宜氛祲廓清車書混一大統會歸於中統太

平今睹於開平凡在陶甄疇非鼓舞臣某等忝以守官

於藩翰不獲稱慶於闕庭想迎六尺之輿遙祝萬年之壽

賀平宋表

孟祺

臣巴延等言國家之業大一統海岳必明主之歸帝王之兵出萬全蠻夷敢天威之抗始于戈之爰及迄文軌之會同區宇一清普天均慶欽惟皇帝陛下道光五葉統接千齡梯航日出之邦冠帶月支之國際丹崖而述職奄瀚海以為家獨此宋邦弗遵聲教謂江湖可以保

逆命舟楫可以敵王師連兵負固踰四十年背德食言
難一二計當聖主飛渡江南之日遣行人乞為城下之
盟逮凱奏之言還輒姦謀之復肆拘囚我信使忘乾坤
再造之恩招納我叛臣盜連海二城之地我是以有六
載襄陽之討彼居然無一介行李之來禍既出於自求
怒致聞於斯赫臣肅將禁旅恭行天誅爰從襄漢之上
流復出武昌之故渡藩屏一空於江表烽烟直接於錢
塘尚無度德量力之心乃有殺使毀書之事屬廟謨之

親稟謂根本之宜先乃命阿喇哈取道于獨松董文炳
進師於海渚臣與阿珠阿塔哈等忝司中間直指偽都
犄角之勢既成水陸之師並進常州一破列郡傳檄而
悉平臨安為期諸將連營而畢會彼極窮蹙迭出哀鳴
始則為稱姪納幣之祈次則有稱藩奉璽之請顧甘言
何益於實事率銳旅直抵其近郊招徠用事之大臣放
散思歸之衛士崛強心在四郊之橫草都無飛走計窮
一片之降幡始暨其宋國主率諸大臣已於二月初六

日望闕拜伏歸附訖所有倉廩府庫封籍待命外臣奉
揚寬大撫戢吏民九衢之市肆不移一代之繁華如故
茲惟睿算卓冠前王視萬里為目前運天下於掌上致
令臣等獲對明時歌七德以告成深切龍庭之想上萬
年而為壽更陳虎拜之辭

進授時厯經歷議表

楊桓

協時正日國政之大端章往考來厯書之明驗一或失
應衆所共瞻豈天運之靡常殆人為之未密昔稱作者

初匪一家其始也莫不精微未幾則旋聞疎闊蓋由年
拘積算日括周分不知闕測以考真率多傳會以求合必
欲行於永久詎容失之毫釐幸當累洽之辰共仰同文
之治事加詳覈法貴變通欽惟憲天述道仁文義武大
光孝皇帝陛下政順陰陽德濟穹壤燭消息盈虛之理
得裁成輔相之宜爰命文臣若稽乾象晝則考求日晷
夜則揆度中星察氣朔之後先定躔離之朏朏精思密
索討本窮原革前人苟簡之規成盛代不刊之典其為

要旨具載成書所有授時歷經三卷立成二卷轉神注
式一十三卷歷議三卷已繕寫成二十一冊隨表上進
干冒天威不勝惶懼震越之至謹錄奏聞伏候敕旨

進實錄表

王 惲

典謨述堯舜之功令名顯著方冊布文武之政義問宣
昭粵自漢隋及夫唐宋咸有信史以貽後來况大業豐
功震今耀古惟深善述首議丕揚洪惟世祖皇帝仁孝
英明睿謀果斷爰從潛邸有志斯民植根幹而佐理皇

網聘耆德而講明治道始平大理再駕長江過化存神
有征無戰迨其龍飛灤水鼎定上都革弊政以維新擴
同人而一視規模宏遠朝野清明內則肇建宗祧創設
臺省修舉政令登崇俊良外則整治師徒申嚴邊將布
揚威德柔服蠻羌加以聖無不通明靡不燭守之以勤
儉樸素養之以慈惠雍和收攬乾綱綜覈名實賞罰公
而不濫號令出以惟行萬彙連茹羣雄入彀削平下土
統正中邦慕義嚮風聲教實朔南之暨梯山航海職貢

無遐邇之殊方且開學校而勸農桑考制度而興禮樂

國號體乾坤之統書畫煥奎壁之文罄所有而殫戰功
不待計而救民之聽言擇善明德緩刑斂福錫民遇災
知懼得洪範維皇之理過周宣修政之勤以致時和歲
豐民安吏怡蓋帝德克周於廣運故至公均被以無方
可謂文致太平武定亂畧繼一祖四宗之志兼三皇五
帝之功開天立極者三十五年立經陳紀者二萬餘事
以謙讓弗違於備紀故纂修未至於成書欽遇皇帝陛

下寅紹詒謀厲精圖治亟鑒觀於成憲思通駿於先聲
深詔下臣俾為實錄宅心宗社凝孝羹牆開館局而增
置官僚敕羣司而大紬圖籍編摩既富搜訪加詳採摭
於時政之編參取於起居之注張皇初橐增未見於罕
聞承奉綸音俾蠲繁而就簡俯殫管見仰體宸衷盡略
虛文一存實事其饗會征伐文物典章彙焉列三代之
英蔚爾開萬世之業與夫才德孝廉之士忠良姦佞之
臣版圖生齒之繁財賦畜牧之盛謹依條據粗致無遺

今具所修成世祖皇帝實錄二百一十卷事目五十四
卷聖訓六卷凡二百七十卷謹繕寫為二百七十帙用
黃綾夾祇封全隨表上進臣等忝備台司幸膺盛典顧
惟載筆才何有於三長勉進蕪辭慮庶幾於一得冒瀆
聖聽不勝驚惶

進三朝實錄表

皇慶元年
十月進

程鉅夫

一入御極聿嚴金匱之藏三后在天實監玉堂之記粵
若稽古克底成書欽惟皇帝陛下孝友慈仁溫文睿哲統之垂

業之創念昔繼承功以著德以彰在茲纂錄首崇筆削之任
式宏龜鑑之圖臣等職忝禁林才非良史繫年繫月豈足盡
於先朝作曲作謨庶有徵於今日臣等以所編成順宗皇
帝實錄一卷成宗皇帝實錄五十六卷事目十卷制詔錄
七卷武宗皇帝實錄五十卷事目七卷制詔錄三卷總計
一百三十四卷繕寫已畢謹具進呈

翰林國史院陞從一品謝表

程鉅夫

天開文運治再覩於熙朝地切詞林恩比崇於極品羣

情胥悅斯道增華欽惟皇帝陛下德與日新聖由天縱
禮儒臣而加異相古所無進院秩以示優自今伊始親
授銀章之重益為玉署之榮臣等學愧前修位隆往代
典謨訓誥敢忘黼黻之勤元首股肱願效賡歌之盛

謝賜禮物表

吳澂

接地風雲際會親逢於明主麗天日月照臨遠及於老
臣賜之以府庫之財衣之以筐篚之幣承恩過厚揆分
何堪俯瀝愚衷仰塵睿聽伏念臣荆揚賤士樵牧孤蹤

幼誦孔氏之遺書無繇見道長值朝家之興運有幸為
民愧碌碌之謏才乏卓卓之奇節以言其文章則體格
卑陋以言其學行則器識凡庸自甘晦迹於深山豈覲
發身於昭代大鈞靡不覆幬小物亦預陶鎔惟成宗汜
至元首賁丘園之隱歷武宗逮延祐洊升館閣之華先
帝擢之禁林今皇處以經幄講讀古訓對揚耿光誤蒙
上聖之簡知得廁羣賢而布列然犬馬餘齒已非少壯
之年而螻蟻微誠莫展驅馳之志外之弗能效勤勞於

郡縣內之弗能裨謀議於廟堂縻廩粟費俸錢素餐甚
矣辱高位速官謗清論凜然因負採薪之憂遂辭視草
之職雖心同葵藿常戀闕庭奈景迫桑榆宜歸田里未
嘗毫釐有補於國况又耄耄無用於時淵度涵容寵錫
優渥茲蓋欽遇皇帝陛下乾坤博施海宇皆春忍令散
材汨沒於泥塗欲俾寸草沾濡於雨露閔憐周恤固君
父惻隱之仁惻歟控陳乃臣子辭讓之禮倘冒昧而拜
貺實踧踖以懷慙敢致懇祈乞垂矜允收此九重之大

惠全其一介之小廉壹是歡榮等如祇受臣栖遲畎畝
既難強筋力以輸忠教誨子孫誓當竭精神而報上所
賜鈔錠段足除已嚮闕謝恩外未敢欽受謹奉表辭謝
以聞

進實錄表

至治三年
二月進

袁 桷

十年御極聿修四繫之編億載揚休殊乏三長之筆祇
成信史上徹宸旒洪惟仁宗聖文欽孝皇帝仁靜根心
溫恭合德詩書造士闡學制以設科法律為師嚴官規

而限祿諷經作則稽古鑑今著龜定主宅之公棧樸藹
奉璋之衆宜登琬琰永祕縑緗欽惟繼天體道敬文仁
武大昭孝皇帝陛下慕切羹牆令行金石率時昭考撫
言行以無遺迪惟前人繼聖明而有造臣等尊聞傳信
竭思纂題閱歷歲年已深慙於尸素經緯日月期不朽
於汗青臣某等所編成仁宗皇帝實錄六十卷事目一
十七卷制詔錄一十三卷總計九十卷繕寫已畢用黃
羅祇封全謹具進呈

賀登極表

虞集

鴻業啓圖世守肇基之迹龍庭受賀躬膺大厯之歸欣
戴云初謳歌為盛欽以世祖紹統乾之運裕皇隆出震
之名推一本之均齊累四朝之繼及於惟景命監至德
之無私粵在大宗御禎符而有慶天心攸屬國勢以安
欽惟陛下道合彌綸功存綏撫立長式遵於家法計宜
允協於輿情車服旌旗皆我祖宗之舊星辰河嶽赫乎
宇宙之新時開太平人用寧壹臣等叨承重任適際昌

期建皇極以敷言親揚彛訓坐明堂而布政永贊成能
經筵官進職謝恩表

虞集

聖作稽古知崇效天開筵肆講於前經當宁屢煩於明
詔垂憲萬世一新經緯之文有臣十人並拜便蕃之賜
獨興睿斷創始明時伏惟昔者明王不以天縱而自聖
本之先哲式資道揆以開人故伏羲則畫於河圖神禹
錫疇於洪範凡將圖治慎在求聞蓋帝王傳授之精布
乎方冊而古今治亂之迹可以鑒觀爰咨博洽之材用

廣聰明之職然守職業者特見諸政事之著惟事啓沃者先端其心術之微故茲曠典之行實重真儒之寄必經業可以發聖賢之蘊必器能可以相禮樂之成必養德之全素蒙孚信必至誠之積可致感通苟非其人不稱茲選而臣等性本固陋學尤迂疎守其師說之遺僅不忘其章句及轉國人之譯粗可達其性情所謂材有限而道無窮心欲言而口不逮猶重昔人之嘆况乎臣等之愚是故設醴上尊數醵廣厦既極詢諮於累歲茂

聞補報之微功敢謂能自得師坐而進道更錫官聯之
重俾專誦說之司雖竊思榮愈增憂責茲益伏遇皇帝
陛下以乾坤之德為德以堯舜之心為心無一念不在
於民生無一事不遵於祖憲遐方畢服猶虞水旱之為
灾羣賢在朝尚恐俊良之攸伏必合二帝三王之至盛
以登四方萬國之太平下收殞末於芻蕘俾益涓埃於
山海臣等敢不力循古訓各盡微衷非先王之法不敢
言冀必由於正路雖末世之事不敢避庶有戒於前車

尚勸九歌用稱萬壽

進實錄表

至順元年
五月進

謝端

瑤圖啓運新元會之重熙金匱紬書述先朝之顯烈素
慚載筆今幸成編洪惟英宗睿聖文孝皇帝德洽堪輿
恩覃動植制禮作樂粲乎宗廟之儀登明選公秩若朝
廷之紀四年無前之盛治兆民至今而永懷惟刑定之
公乃可稱於信史固纂修之久將有俟於明時欽惟皇
帝陛下通駿有聲粵若稽古謂文武之道必方冊而後

傳而堯舜之心在典謨而可舉彰繼述之善志大揚厲
之洪休蓋尊所聞莫匪爾極臣等事微四繫學愧三長
煥乎文章無能名其為大寫之琬琰庶有補於將來臣
等所編成英宗皇帝實錄四十卷事目八卷制誥錄二
卷總計五十卷繕寫已畢謹具進呈

進經世大典表

至順三年
二月進

歐陽玄

堯舜之道載諸典謨文武之政布在方策道雖形於上
下政無間於精粗特於紀錄之間足見彌綸之具是以

秦漢有掌故之職唐宋有會要之書於以著當代之設
施於以備將來之考索我國家受命龍朔繼休鴻基發
政施仁行葦之忠厚世積制禮作樂闢雎之風化日興
紀綱具舉於朝廷統會未歸於簡牘欽惟欽天統聖至
德誠功大文孝皇帝陛下總攬羣策躬親萬幾思祖宗
創業之艱難與天地同功於經緯必有鋪張以揭皦日
必有述作以藏名山爰命文臣體會要之遺意徧勅官
寺發職故之舊章倣周禮之六官作皇朝之大典臣某

叨承旨諭俾綜纂修物有象而事有原質為本而文為
輔百數十年之治蹟固大略之僅存千萬億世之宏規
在鴻儒之繼作謹繕寫皇朝經世大典八百八十卷目
錄十二卷公牘一卷纂修通議一卷裝潢成帙隨表以
聞伏取進止

元文類卷十六

欽定四庫全書蒼要卷二萬一百

元文類卷十七

元 蘇天爵 編

表

賀正旦表

劉敏中

歷頒夏正大春秋一統之書禮謹漢儀受圖貢四方之
賀歡均朝野慶洽天入中賀剛健體元寬仁育物董官

常而敷聖訓炳如日月之臨恤民隱而降德音翕叶地

天之泰至和斯應景福維新臣等夙被寵榮忝司端揆
無尺寸效仰裨財成輔相之功願億萬年永享佯奐優
游之樂

賀冊后表

楊文都

聖德日新端齊家以身之本坤元位正備臨軒發冊之
儀慶溢九重歡騰四表

中賀

受天成命遵祖詒謀謂王

教攸基莫若人倫之重然治道之至庶資內治之勤昭
法象於軒星崇聲明於椒掖以贊嚴宸之孝理以協太

母之徽音臣等服在近司顯觀盛際道符義易占順承
載物之亨願擬堯封申富壽多男之祝

賀元旦表

姚登孫

寶歷晨開恩誕敷於朔紀瑤池春滿慶先輯於東朝日
月清華神民闔懌

中賀

道符乾統躬啟皇圖懿範難名

備聖人之全德仁規妙運濟天下於太寧壽並兩儀福
延萬世臣等班聯文石職忝膠庠仰測卦爻喜三陽之
通泰俯陳歌頌奉億載之怡愉

賀建儲表

姚登孫

坤元居上扶皇統於中天震器有歸衍孫謀於奕世神
人閭懌河岳清寧

中賀

聖德難名徽音夙著心游太極

兩儀妙立範之功身佑三朝九鼎重宗磐之勢適春宮
之肇建知景命之永延臣等嘉與諸儒欣逢盛典日月
啟重光之運幸圓照臨華嵩開萬壽之期惟塵歌頌

賀聖節表

李之紹

寶曆建元協重華之嘉運瑤光貫月開上聖之貞符盛

德在秋昊天有命中賀聰明稽古孝友根心丕顯文謨
端拱巖廊之上達觀新邑式均道里之中揆震夙之昌
辰卜豐穰於今歲璇璣肇紀玉斗儲祥臣等肅謹班聯
遥瞻粹穆宣昭鴻業載賡七月之詩耆定武功願繼萬
年之雅

賀聖節表

鄧文原

天開景運篤有道之曾孫電統神樞受介福於王母觚
稜瑞靄閭闔闔臚傳中賀誕紹鴻圖丕承駿命至仁育物

得秋而萬寶成盛德在躬居所而衆星拱當立經陳紀
之始為施仁發政之規郊廟肇禋朝野胥樂臣等名叨
玉署目極璇霄廣文王有聲之詩載歌律呂衍殷宗無
逸之壽虔祝華嵩

賀正旦表

盧 亘

瑤圖星拱禮盛三元璇宇天臨懽同九有煥宸文於懿
範洽聖孝於英猷中賀迪詰徽柔濬幾淵靖宗勲廟社
消羣慝而佑顯謨決策宮闈定神器而凝景命妙用夙

諧於坤載大明參懋於乾剛臣等久玷中書肅承內治
儀新鴻號深仁昭被於綿區嘉錫隆禧慈訓永光於汗
簡

賀親祀太廟表

延祐七年

虞集

九重御極太平端拱於中天萬舞奏庭盛禮告成於清
廟羣方胥贊百辟交孚

中賀

剛健日新聰明時憲祖有

功宗有德衍歷服之無疆車同軌書同文底烝民之作
又袞冕華昭於日月笙鏞和協於神人崇億載之洪基

舉累朝之曠典臣等忝司政府肅侍齊宮選豆駿奔仰
宣室受釐之慶衣冠稱賀效華封祝聖之誠

賀親祀太廟表

天歷元年

虞集

寶歷在躬祇服祖宗之訓太宮修祀於昭禮樂之文海
宇均安神人交暢中賀德崇恭讓道積寬仁艱難具察
於民勞佚戴密繇于天授慶雲就日護璽綬以來歸瑞
雪宜年洗干戈而載戢圭衮會龍章之盛簫韶致鳳羽
之儀臣等備位台衡依光宸極羣工述職贊文治之成

功萬壽膺符受明禋之純嘏

賀聖節表

虞集

春回正月律和舞鳳之庭日浹芳甸瑞紀流虹之渚綈
儀游舉治象更新

中賀

盛德在躬至仁育物紫微華蓋

煥乎經緯之為章朱草醴泉妙與生成而合化天開壽
域入樂熙辰臣等弱翰無功清光有赫對揚休命絲綸
緝黼黻之文歌頌永年簡冊載衣裳之治

賀正旦表

虞集

陽春發育明新若日之方中正朔會同溥博如天之為
大顯承盛化協慶所庭中賀神武成功至文備德綜萬
幾而益裕達四聰而弗遺禮樂從容建用維皇之極圖
書宣朗緝熙於穆之純假郊廟以受釐率臣民而錫福
臣等叨陪鼎鉉式贊鈞陶時和歲豐願保無疆之祚風
淳俗美永歌有道之朝

賀正旦表

宋 本

泰元神筴天開六甲之端北斗帝車星值三朝之旦立

政伊始與時俱新

中賀

睿智有臨明哲作則萬機初振

熙鴻號於紀年九廟載安被龍光於宗黨誕啟用材之路式推澤物之仁臣等身際昌辰首班著位風行雷動賡歌殊愧於古初日升月恒善頌惟先於壽考

賀親祀南郊表

至順元年

謝端

四方于理事天致恭已之誠三年而郊卜日叶用辛之吉功成治定禮備樂和

中賀

瑞拱無為純一不二肇舉明

禋之典載嚴升配之文大呂黃鍾音協雲門之奏鎮圭

縑籍輝聯蒼壁之華祥風和氣之與游景星慶雲之疊
見穹示集貺宗社蒙休臣等叨佐清朝欣觀熙事列圖
壇之八陛幸陪漢時以待祠陳秦階之六符願舉兕觥
而上壽

牋

賀正旦牋

瓜爾佳之奇

位拱少陽仗簇黃麾之曉氣暄太簇祥開青禁之春邦
本益隆輿情胥慶

中賀

仰遵聖訓參蒞政機執中傳精

一之心作貳毓元良之望重明繼照陰邪常遏於未形
九四在淵陽德克潛於己著茲履端之云始宜介福之
孔多某等素乏長材叨居端尹星輝海潤莫酬沾被之
恩月恒日升第祝綿延之算

賀千秋牋

楊文郁

陽常居於大夏方收養毓之功震一索為長男載啓亨
嘉之會慶鍾甲觀歡溢寰區

中賀

克哲克明允文允武

春坊翊善茂隆邦本之貞曉寢問安長奉天顏之喜茲

臨彌月之節宜膺百順之祥臣等竊備詞官進趨庭賀
幸聞樂府奉重輝重潤之章請合輿情上俾熾俾昌之
壽

賀千秋牋

袁 楠

心依宸極前星耀於明堂卯為春門大電環於甲觀盛
德集福至和儲祥

中賀

體仁法元師古合道溫恭事帝

密輔相以生成問學積躬益緝熙而光大疇咨黃髮之
彥庸佐青闈之規茂對誕辰宜膺純嘏某等肅瞻儲禁

忝職詞林鶴賀陳儀喜承顏於兩殿鴻圖衍慶願介壽
於千秋

賀正旦牋

虞集

玉燭調元播陽春於萬物禕衣乘翟奉景福於一人懽
溢宮闈慶延宗社

中賀

柔嘉惟則博厚無疆帝業中興

五色鍊補天之石女功內治七襄成報日之章膺瓊冊
之瓊華衍金支之奕葉茂迎蒼厯益介洪禧某等備位
外廷稱觴前殿二南風化歌闕睢正始之音萬年室家

樂既醉太平之運

箴

絅齋箴

鄧文原

元坦使君以絅名齋屬巴西鄧文原敷繹其義乃作箴
曰

維古憇人德美內植揚休弗矜反躬藏密在易坤厚含
章可貞明夷蒞衆用晦而明善欲淵潛志無銜飾辟諸
裼襲身章之則彼夸毗者內視歆如迺崇澆偽以眩羣

愚鼓鍾有聞屋漏滋愧爾車甚澤而人斯瘁繫南郭子
尚綱是遵匪曰隱几式企書紳

慎獨箴

安 熙

可尊者德可畏者天無處不有無時不然念慮之發必
有其幾勿隱其隱勿微其微從事於斯是曰慎獨自此
精之萬物並育豪髮有間天理弗存利欲紛拏厥心則
昏於戲戒哉敬作此箴書諸座隅以警其心

銘

簡儀銘

姚燧

舊儀昆崙六合包外經緯縱橫天常袞帶三辰內循黃
赤道交其中四遊頻仰鈞簫凡今改為皆析而異繇能
疏明無窒於視四遊兩軸二極是當南軸攸沓下乃天
常維北歌傾取軸槩應鏤以百刻及時初正赤道上載
周列經星三百六十五度奇贏地平安加立運所履錯
勒于隅若十二子五環三旋四衡絜焉兩綴闕距隨捩
留遷欲知出地究茲立運去極幾何即遊是問赤道重

衡四弦末張上結北軸移景相望測日用一推星兼二
定距入宿兩候齊視巍巍其高莫莫其遙蕩蕩其大赫
赫其昭步仞之間肆所贖攷明乎制器運掌有道法簡
而中用密不窮歷技古陳未有侔功猗歟皇元發帝之
蘊畀厥羲和萬世其訓

仰儀銘

姚燧

不可形體莫天大也無競維人仰釜戴也六尺為深廣
自倍也兼深廣倍絜釜兌也振溉不洩繚以澮也正位

辨方日子卦也橫縮度中平斜載也斜起南極平蓋鐵也小大必用入地畫也始周浸斷浸極外也極入地深四十太也北九十一赤道斷也列刻五十六時配也衡竿加卦巽坤內也以負縮竿子午對也末旋機杖竅納芥也上下懸直與鐵會也視日漏光何度在也暘谷朝賓夕餞昧也寒暑發斂驗進退也薄蝕終起鑒生殺也以避赫曦奪目害也南北之偏亦可槩也極淺十七林邑界也深五十二鐵勒塞也淺赤道高人所載也夏短

冬永猶少差也深故赤平冬晝晦也夏則不沒永短最也二天之書曰渾蓋也一儀即揆何不悖也以指為告無煩喙也閭資以明疑者沛也智者是之膠者怪也過者巧歷不億輩也非讓不為思不逮也將窺天眊造物愛也其有俟然昭聖代也泰山礪兮河如帶也黃金不磨悠久賴也鬼神禁訶庶勿壞也

漏刻鍾銘

姚燧

靈臺設簾巍以尊元間大呂非其鼎擊曠善鼓手自煩

宮商良諧等釜盆請無以聲以功論一日之中兩昕昏
一鳴一刻有度存九圖一圃折柳樊黔首時作時饗殮
日月如是相告敦三辰聽命循軌垣四序不忒迭寒暄
萬物生翕盈乾坤何獨治厯道此源凝熙帝績高羲軒
積世而運會而元吉金之舌慎莫捫輟響誰其代天言

渾象銘

楊桓

於昭聖皇德惟天希密密乾坤動符化幾乃命太史考
順求違制器象天具體而微度數棊布星次珠輝道分

黃赤擬議玄規兩極低昂中主璇璣匱方象地極樞以
維地本天函術取外圍反而觀之其趣同歸體雖至約
用足明大象設目前人居天外觀天之裏合象之背日
月交錯五行進退造化無窮不出戶內始終參求簡儀
是配於昭聖皇夙夜睿思先天天合後天奉時先後惟
天聖皇無為

玲瓏儀銘

楊 桓

天體圓穹三辰在中星雖紀度天實無窮天度之數環

周三百六十五度四分度一因星而步推日而得月次
十二往來盈虧五星參差進退有期判為寒暑分為四
時太史司天咸用周知制諸法象各有攸施萃於用者
玲瓏其儀十萬餘目經緯均布與天同體協規應矩徧
體虛明中外宣露玄象森羅莫計其數宿離有次去極
有度人由中闕目即而矚先哲實繁茲制猶未逮我皇
元其作始備實因於理匪鑿於智於斯萬年寶之無墜

高表銘

楊桓

聖人修政惟農是本農之所見時則為準過與不及民
安究之動措由中聖人授之時在於天術何以得制器
求之乃見天則日月周運閏餘歲成盈虛消息在表斯
微分至既辨氣序乃會朔晦一定弦望由對爰演新曆
用詔民時百工允治庶績用熙表中以正圭平以直不
言而喻與時偕極天德芒芒參以明焉民生皞皞振以
興焉惟昔八尺景促分密為用雖可每艱辨析聖皇御
極百度惟新乃五其昔其用益神表高之法先哲匪憚

其顛景虛取的是惠表梁上陳景符下依符竅得梁景
辰精微揆月有方闕几是映几限容光圭表交應器術
之密推步之精厯古於今斯畢其能上天之載無聲無
臭聖皇儀型在其左右仁民育物以對天祐眉壽萬年
寶茲悠久

太史院銘

楊桓

天厭下土之亂眷求聖哲以作民主太祖聖武皇帝應
運挺生以神武戡除禍難遂定皇元之寶命累聖肖德

增功績烈遠今憲天述道仁文義武大光孝皇帝稟資
聖神自潛藩邸躬率師旅有征無戰天心人心攸屬攸
係及位中國大建都邑任賢使能分設百官政教既行
乃制禮作樂廟享祖宗仍遣將帥四征未臣始統一六
合周臨天際端居無為飛潛動植仁惠溥霑民既無事
唯夫耕女織工器商貨自勞衣食聖慮周悉凡厚民生
者無不為之以農事為四民衣食之本既設有司以董
其勤又思為振舉之務乃立太史院以講明天道教授

民時焉至元十三年上以循用大明歷久而失當欲覈其制以太子贊善臣王恂業精算術凡日月盈縮遲疾五星進退見伏昏曉中星以應四時者悉付其推演尋遷太史令以都水監臣郭守敬頴悟天運妙於制度凡儀象表漏考日時步星躔者悉付規矩之尋授同知太史事歷成遷太史令以前中書左丞相許衡為命世之賢凡研究天道斟酌損益者悉付教領之輔以集賢學士臣楊恭愷其提絜綱維始終弼成者實前中書左丞

轉大司農臣張文謙尋以昭文館大學士領太史院事
凡工役土木金石悉付行工部尚書兼少府監臣段貞
以經度之凡儀象表漏文飾匠制之美者悉付大司徒
臣阿尼格十六年春擇美地得都邑東墉下始治後垣
縱二百布武橫減四之一中起靈臺餘七丈為層三中
下皆周以廡其下面日中室為官府以總聽院政長曰
令次同知院事次僉院事以宰輔之重領於上者無定
員其屬有主事有令譯史有幹事有庫局之司左右旁

室以會司屬議凡推測星厯諸生七十人蒞以二局一
曰推算其官有五官正有保章正有副有掌厯分集於
朝室二曰測驗其官有靈臺郎有監候有副三曰漏刻
其官有挈壺正有司辰郎分集於夕室凡器用出納於
陰室中層離室以列景曜巽室以措水運渾天壺漏坤
室以措渾天象蓋天圖震兌二室以圖南北異方渾天
蓋天之隱見坎室以位太歲乾室以貯天文測驗書艮
室以貯古今推算厯法臺顛設簡仰二儀正方案專簡

儀下靈臺之左別為小臺際葺周廡以華四外上措玲瓏渾儀靈臺之右立高表表前為堂表北專石圭圭面刻度景丈尺寸分圭旁夾以連葺可圭上露天日為度景計靈臺之前東西隅置印歷工作局次南神厨算學設位如上初改歷之議既行即遣官四遠測景以相參驗若高麗瓊崖成都和林蓋擬義和仲叔之命又自上都南五千里中若東平陽城鄂吉等州各遣官測驗以求遠近之數十七年冬至以新歷進遷官賞賚有差十

八年頒行之十九年以祕書少監臣趙秉溫遷昭文館
學士知太史院事明年啓皇太子旨以諭德臣李謙撰
歷議二十一年以左侍儀奉御臣鄂爾根薩里遷集賢
學士尋遷大學士並兼太史院事遂以二十三年春同
進歷經屬共二十一卷仍以餘事未成者奏以臣桓與
其議若歷經歷式等序若表漏儀象等銘臣桓既冒言
矣又拜手稽首原立院之初序而銘曰

天鑑下民亂靡有定孰能一之聖哲受命太祖神武始

開乾坤朔業垂法以貽後昆續緒紹功剷除妖昏逮今
聖皇天錫勇智內修法度外遣將帥伐罪弔民罔越厥
志炎方歸命赦其後至武功告成萬國來萃同軌同文
重譯奉贄小大悉臣師旅以寧恩與萬方永保太平黎
民定居蕃息生生為衣而蠶為食而耕士勸其賢工勸
其能闕阨夜開商旅通行民惟勤克罔適天宜匡之翼
之以頌聖恩乃立太史法遵黎義欽若天道敬授民時
教其動作時種時穫教其趨向是宜是吉五禮之舉選

時為日代卜代並不勞龜策期指斯民康壽之域民祝
聖皇眉壽萬年民祝聖皇五福駢臻民祝聖皇億兆子
孫七政順軌陰陽調均時雨時暘化育秋春蕩蕩巍巍
盛德何言天覆地載太平無垠

瓶城齋銘

為淮東憲司知
事凌德庸作

閻復

利慾之兵或墮吾城蹂厲之機或發吾瓶墨其守不若
修仁義之干櫓全其緘不若駕聖賢之說鈴若然則城
何懼於脫扁瓶何患乎建瓴哉

王孝女旌門銘

劉因

女家容城西以母喪感念遂不嫁終身州上其行御史
按實禮部令旌表之內翰盧公署其門曰孝女王氏縣
人劉因銘曰

孰不娶終身曰魯山之元道州之陽史名卓行何謂非
平常二子且然女奚責望盧公表之何用以戒荒

訥齋銘

吳澂

君子之訥不盡其有餘小人之訥將言而囁嚅得善敏

於行近仁者歟是為君子儒非小人儒

蘇氏藏書室銘

袁 楠

大學鴻烈代天昭明精思纂微辭以立誠匪事於言不言奚宣析理日繁直致行傳謂默足以通絕其知聞敬焉孰持道焉孰存趙郡氏蘇崇其書楹剖決雲章經緯有程靈根湛虛服習粹精廣以觀萬約以守一迎之莫尋倚兮不頤仰止元聖學海彌溢

虛室銘

虞 集

天地萬物寓形太虛何有非實虛則俱無有室非虛何
名虛室室有毀成而虛無成無受毀質室之在虛無不
加廓有不加室善居室者反同於虛萬古一息

奎章閣銘

虞集

天歷二年三月吉日天子作奎章閣萬機之暇觀書怡
神則恒御焉臣等奉勅刻銘曰

維皇穆清中正無為翼翼其欽聖性日熙迺闢延閣左
圖右史匪資燕娛稽古之理經緯有文如日行天爰刻

貞玉垂美萬年

知許州劉侯民愛銘

富珠哩翀

至大元年秋奉直大夫許守劉侯既終更矣郡縉紳先生田浦城劉興國及舊家望族郡人之父兄長者謀劉侯字民之政於石屬筆小子翀懇讓不獲敢蹟侯行事謨次之大德龍集乙巳夏六月侯下車家政斬然閭無雜謁其在猷為苟有利民無或不舉許北趾於汴南楫淮楚素號多事侯材識精敏百務叢劇聲容舒徐刃迎

而節解吏無稽牘獄無枕訟不尚苛猛而稟不可犯自
公而優入則杜門端晏游永典籍出則賓禮先覺隆獎
學校三時既隙則帥郡屬叩校官請益經史親為之倡
繇是郡政翕然侯澤物仁而有方耕鑿樹畜求底實效
及終三年諸軍數牧外丘陵原隰懇闕殆盡初郊農貿
穀市僧連郡豪徵糴外關擅輕重以售嫫弱胥困乃立
斗斛市距州治重脅糴翔價之法趨者如歸糴雖升合
以上無敢摧剝民農兩利之侯以事出法漸弛復襲舊

至杖大馭數人法復立民頌歌之歲丙午河南諸郡饑
流瘠日至春穀價勃湧首發私庾大縮價聽民糴募富
民粟數萬石出糴市慮糴有不均也於諸社責其長日
閱數賦與之夏雨戕麥得請出郡廩積年鼠耗鑿米薄
價紓民春夏徂秋無凋瘵者明年荐饑羸莩狼戾請省
出公緡賑之民為蘇中統抵大德凡所立有司法程討
閱簿書彙帙度實而據守不跲故勇於拯民而善禦其
害省大核屯田臨潁鄧艾口民稻田三百頃人有說省曰

此古屯也可復築之下侯按實之侯按至元中司農研水利拓民業隆平生息之道也業此皆三四十一年暴取之民措何地省不遑以兵民恫疾之狀迭陳不可卒止宣徽歲遣使征羊馬法三十取一至則肆虐取人莫誰何侯度其至今縣民大書其法於堊壁患遂止程約五縣繇賦齊均凡出錢縣官市物民間曰和買民產所有猶未易供無之則估百倍賦官郡縣苦督責無敢拒貪肆者亦陰幸漁獵雖瘡痍其民不恤侯深患之土有均賦

之苟無之抗簡覆陳不允不止鄢陵扶溝產紅藍粹不
時買萬鉅時其地年歉而藍腐民大驚蹙省以侯敏幹
略趣買之相其故力請罷之是不獨仁於許又有以仁
其鄰也省檄論囚荆而時荆楚大水民饑歸請撤禁山
澤以活危墊省移中書如請民濟於阮是其澤不獨囿
於近又有以及其遠也其聽訟明察而果哀矜惻怛未
始不行其間襄城南距湛河與葉交壤葉民之鹽取解
池濟鹽止襄舊樹石河之南堧鎬以畫鹽之法葉令

妄徙而北侵襄民近百家嗾漕屬以其法酷穿之兩縣
飛狀聞辯葉引陝漕合攻襄中以危法時侯偕省使者
會決之卒以理摧葉復石舊疆民底寧河南先民踈土
曠田價至弱雖有質鬻而契券濶畧鹵莽逮今民日生
集叢蓁灌莽盡化膏沃價倍十百闢闢滋熾泰吏蠹法
孔穴焚出至有綿曠歲時而莫之決者侯既清白復詳
聽覽而洞情偽佑是懲非至未半歲決以百數訟為衰
民葛英女嫁而奔人英蹟之獲他婦憚嚴其舅姑而私

竄外者寘家令妻教塔族事如其女返魂他屍者歸塔

不納一男子果爭之訟不決候行縣詰之情立出民有

以計誣置其同行者訟縣醉亡楮緡千獄建人數十訊

不白屢愬州至據地以慟覘色詐立屈之決囚南陽主

婦告奴酖其夫三日死榜楚極惜毒獄久不立候讞曰

實有毒立死無少緩者簡孚獄供有寃立賞之其聽決

多此類也舊水旱禱祠桑門羽流雜巫覡囁無益一

不取齊被精壹以走群望靈貺昭答嘗春旱禱八龍井

明日雨大作民有擁香拜舞治所者人既德侯侯善使人而不知所務長社尉解僻遠為創築近郡治使與庫傳狴犴相連峙微循捍衛弭患無形三皇肇立民極令天下通祠而舊郡祠陋不構新之崇葺廟學植檜栢六十四本築室藏書購塑工體先賢貌影自濂溪及紫陽朱子像而祠於學故實凡相交承則帥寮屬厚贐禮去者於侯又最豐終讓却之始終銖髮無取及是人益信在政曄曄嶽牧風紀屢倚用之軋強鋤暴在人所不敢為

侯不憚也將退政之日其下誓伏如甫至談者偉異之
名聲籍籍上游諸公多譽籍之交剡騰薦不一二數士
論稱奉法恤民有古良二千石之風知言者是之侯名
天孚字裕民家大名以國書生從事中書出判東平移
漕司擢知冠州遂遷許風岸嶄立器度凝遠春秋方強
摠用未既加忠孝愷悌出天稟能以學濟之淵乎莫測
也浦城名九疇興國名庭瑞皆仕焉而已者聲實素著
郡人望所推先郡既不忍弭忘侯德兩公倡率之人彌

咨嘆其公云邠既敘其詳乃撮而詩之庸翼卽人寥邈
之思辭曰

卽侯繩繩三歲逆旅孰莫我矜侯吾父母我饑以寒燠
我舖我鳴袖於家田墾在野繫我窘躋均恫其身膏以
雨澤煦吾陽春惟古立學定民之命治有本末禮樂刑
政誰蔑棄之謂能其官我侯至止德馨如蘭士蒙顒顒
侯教載之縉紳煌煌侯勞來之孰匪人哉而玩侯法將
雖芟之我用是恕善達而施天下之兼寧獨吾私一卽

是淹車聲轡轡民莫侯攬有堅其礪鑄配琬琰鼎鼎其
來疇允候蹟跂予望之其永無極

安氏尊經堂銘

富珠哩翀

明明尊經安氏堂之用有傲惕予其銘之於在古昔挺
起神聖越紹上帝昭我明命暨蒼姬氏四術廼崇詩書
禮樂順古範銘文武道衰四教崩弛孰其拯之天縱夫
子龍馬獻圖用著著策吉凶悔吝開我人則二禪三繼
曰帝曰王典謨訓誥明我天常志欲有言刑於詠訶雅

頌得所神人以和王綱失維列侯遞霸其敢僭踰筆討
無赦是謂四府其用不窮大禮大樂升降污隆宇宙有
經終古莫或民無能名功載人極鼎鼎儒者相與守之
孰吾堯桀相與撻之曾子思孟荀董王韓周程張朱以
達聖元不息不泯皇衷民彝其有能奮立百世師安氏
東垣世以儒名味道之醇服義之精百氏謏聞寧不有
當處宜下陳經無二上至小無內至大無外晦不加感
顯不加泰風雨震凌帡幪是屋六籍鳳峙疇疇非雌伏安

父之嗣伯仲叔季楫子韶孫繩繩繼繼豈徒藏之斯務
明之豈徒尊之斯務勤之其徒之賢蘇伯修甫將以所
聞往相告語多岐亡羊克敬克念無或怠惰請以銘鑑

儼思齋銘

楊剛中

理究斯明為殊為同學求斯詳疇初疇終匪心斯圖何
彰弗蒙既端爾容既肅爾躬冥凝虛遊視遺聽空思而
以斯無微不通跛倚踞歌必弛於中矯笑躁言必隳而
功戒哉無忘惟道之融

元文類卷十七

欽定四庫全書薈要卷二萬一百一

元文類卷十八

元 蘇天爵 編

頌

賈侯修廟學頌

吳 澂

世祖皇帝既一天下作京城於大興府之北其祖社朝
市之位經緯塗軌之制宏規遠謀前代所未有也至元
二十四年設國子監命立孔子廟暨順德忠獻王哈喇哈

遜相成宗始克繼先志成其事而工部郎中賈侯董其役廟在東北緯塗之南北東經塗之東殿四阿崇十有七仞南北五尋東西十筵者三左右翼之廣亦如之衡達於兩廡兩廡自北而南七十步中門崇九仞有四尺修半之廣十有一步門東門南之廡各廣五十有二步外門左右為齋宿之室以間計各十有五神厨神庫南直殿之左右翼以間計各七殿而廡廡而門外至於外門內至於厨庫凡四百七十有八楹肇謨於大德三年之春

訖功於大德十年之秋於時設官教國子已二十年矣
寄寓官舍不正其名丞相以為未稱興崇文教之實也
乃營國學於廟之西中之堂為監前以公聚後以燕處
旁有東西夾夾之東西各置堂以居博士東堂之東西
堂之西有堂東室之東西室之西有庠庫之前為六館
東西嚮以居弟子員一館七室助教居中以蒞之館南
而東而西為兩塾以屬於門屋四周通百間踰年而成
不獨聖師之宮巍然為天下之極而首善之學亦偉然

聳天下之望遠邇來觀靡不驚駭嘆美其高壯宏敞蓋
微丞相其孰能贊承聖天子之德意而微賈侯亦孰能
聞張賢宰相之盛心哉侯之董役也晨夕督視不避風
雨寒暑措置分畫一一心計指授工師莫能違焉陞本
部侍郎又陞本部尚書出領他處營造事身雖在外心
未能忘廟學也至大二年還朝拜戶部尚書首詣廟學
環匝顧瞻如其家然嗚呼世之居官者大率簿書期會
刀筆筐篋是務知政治之有原名教之可宗者幾何入

哉人咸以為迂而侯拳拳汲汲惟恐或後蓋其資識卓
矣侯少時為憲府屬憲長誣其副柄國者仇正直欲置
之死數十人皆將連坐證左迫於拷掠悉附和以成其
誣侯與在數中獨守正不阿徇淹繫三載卒不變移受
誣著籍是得脫自戶部尚書而參議省事也會有羅織
之獄侯議詳讞大忤時宰幾與同罪賴救解以免嗚呼
侯之為人如此宜其與聖道儒術深有契也非資識之
過人而能之乎侯每以范文正期國學諸生徵聞而愧

輒面赤汗下夫文正之為文正無他亦曰先天下之憂
而憂後天下之樂而樂耳嗚呼安能人人不負侯之所
期者哉侯名馴字致道濟南鄒平人將歸其鄉故著侯
之所以有績於廟學者為頌至大四年三月朔國子監
丞吳徵叙詩曰

詩十章章四句

於赫皇元澤彌八埏翼翼京師風化攸先
孔道曷明千古日月帝曰廟之以對光烈

顯允龐臣欽輔神孫祖訓是承往聖是遵
相謂而馴而職而職乃基乃構乃墁乃甃
侯祗相言弗懈以虔新宮巍巍有倬其騫
宮牆之西學官爰作我宏爾居爾懋爾學
爾士來游四方具瞻爾則匪遙像貌肅嚴
恂恂賈侯克敦克敏孰挫其廉孰混其畛
一正不阿百折不回族斯糾紛剽之恢恢
廟學之崇天子之德丞相之功賈侯之力

青宮受寶頌

虞集

天歷二年六月己酉皇太子受寶於行幄臣等拜手稽
首而言曰臣聞古之所謂能以天下讓者審幾於先事
謂之至德既勅而庸與謂之予賢是皆入道之常而未
若今日之盛者也我皇太子以仁文之資知勇之德當
撥亂反正以續祖宗之統則躬當大難嬰犯霜露而不
辭及功成治定既膺厯服之歸則推奉聖兄謙居儲貳
而不伐剛明之斷堅於金石而無變素定之誠質諸天

地而無疑求仁得仁若處固有樂道忘勢訢然無為此
實帝王之所難能古昔之所未有而卓然特見於前後
千萬世之內者也臣嘗讀周易而觀於乾龍之象自潛
至躍時升位異九五天飛中正極矣蓋進而上庸知退
夫而仲尼之贊上九曰唯聖人知進退之正言非聖人
不能及此噫仲尼發此義於千五百年之前而昉見其
事於聖代宗社生靈萬世無疆之福也於戲盛哉臣等
幸以文學得備延閣之顧問親逢盛禮爰敢作頌以獻

頃曰

於穆皇儲文武聖明於赫大帝受命輯成天運日行既
明既健神交意孚曾是修遠帝載龍旗其行遲遲萬民
綏來皇儲有思載思載瞻于廬于旅式好在原莫敢寧
處風雨孔時道無游塵肅肅鑒車通宵及晨帝曰勞止
毋趣行邁會言近止交喜更慨灤陽之京世皇所營我
母即安次于郊垌有豐草雨露既渥差垌於牧繁纓
濯濯皇儲攸止百靈具扶羣臣受詔奉寶來趨維時範

金龍光上燭匪舊以新景命攸屬寶來自南追琢有章
卿雲隨之五色景芒有親有尊有友有愛以承武皇聖
孝斯在古人有言兄弟家邦咨爾臣庶於乎勿忘史臣
作頌丕昭盛德既壽以昌子孫千億

駐驛頌

富珠哩

繼天體道敬文仁武大昭孝皇帝即位修明世祖皇帝
隆平故事以故東平忠憲王之孫司徒忠簡王之子拜
珠丞相中書至治元年詔若曰忠憲弼我世祖功在社

稷德在生民其勅詞臣即王所有范陽采地朔南康莊
碑之昭示悠久冬刻銘既完十有二月丞相承詔藏事
凡犒工勞衆郡邑無所掇饋賀無所受天子遣使犇牢
之饗拒鬯之禋數異禮隆不一而止父老聚觀或至感
泣明年春正月帝幸涿州至碑所重瞳凝竚顧瞻有懷
秋九月幸易州還丙午帳殿碑垣之南駐輦御殿上顧
丞相若曰汝祖考之績之盛世載帝室維朕不忘亦惟
汝之賢有以相朕益懋世德故也丞相頓首謝翌日既

欽定四庫全書

不易懷往烈慰股肱聖度淵深非一介臣能闕萬一敢
即所聞見以獻頌曰

赫赫聖明嗣大寶位祖武斯繩昭我皇制慨想先正孰
佐我家奄奠八紘帝業以華昔我太祖疆理萬國忠宣
忠武功高輔翼雷雨方屯忠武沉掃華夏之民國王蔭
祿巍巍世皇幅員既同弼成治隆忠憲之功奕奕世憲
虎變莫測年未及冠烜著明烈端冕正笏不動色聲俊
傑在職儒碩在廷何昧不昭何墜不舉何絕不紹何遠

不睹二十年間再秉鈞軸天極地蟠孰匪亭毒至元始
終中外人心大耋韶童統慕至今天日清明終古莫晦
柱石廟廊宗社永賴相國今誰忠憲脩嗣民之望之忠
憲是繼克繼克庸滋益光大一以至公熙我天載帝謂
侍臣丞相之賢家世所因其勅詞垣于忠憲勛大侈以
文配永河山以竦見聞涿鹿范陽王有采食山川蒼蒼
北拱帝極蛟螭盤拏大鼇負之德音不廟神訶護之六
龍翱翔馭日霄漢再狩郊垌目此銘篆淵鑑昭回駐驛

永懷廓清煙霾以霽九垓從臣焜煌千乘萬騎能不激
昂以勵忠義世世夔契生此德門君臣道合豈徒示恩
忠憲來雲源源裔裔臣頌茲刊丕告無既

馮侯去思頌

顧文琛

皇帝即位之明年詔地官攷輿地圖舉天下縣邑民數
之繁者陞為州置賢守臣以韋百姓於是越之諸暨實
得今馮侯翼越在漢為會稽郡其民剽輕漢嘗以貴近
臣為之守猶或不振輒報開罷自唐以來越為雄藩諸

暨為劇縣尤號難治侯始至州訪民疾苦知姦猾為民
害由是嚴為之禁里社長有藏匿者同其罪姦猾望風
引避民賴以安鄉胥舞文虛增稅石民以抑納為苦侯
洞察其姦令民得自陳訴積年弊欺一旦盡去先是吏
卒旁午田里無虛日侯至悉禁戢之亦無廢事有以私
謂暮夜禱於侯者侯輒斥去之邦之士喑喑稱廉侯聞
笑曰廉士大夫常分也廉耻道喪久矣吾豈詭衆哉吾
求以不負吾所學耳凡豪強撓法者必痛加摧抑無少

假借既不逞則群怨之侯不為動郡政之暇輒引諸生
講習經史州吏環聽之凜凜乎有富而教之之意會行
省以浙西某路荒田失實及瀕海郡鹽法多弊檄侯往
問州民數千人遮道請留不得請則相對涕泣如失慈
父侯奉檄所至弊衣徒步以察微隱其所以詘姦豪而
伸孱懦者甚於為州嗚呼若馮侯者求之古循吏殆未
見其比也或曰班固序漢循吏五人而龔黃為之最如
龔黃者獨不可為侯比乎僕應之曰漢循吏易能也馮

侯未易能也漢郡地方千里太守秩二千石考最者輒
入為九卿次不失為三輔位尊而權任專故其道易行
其化易成而其事可勉而至也今自州而上有會府有
部刺史方伯連率而知州官五品秩不滿五百石制其
權而撓其政者非一獨馮侯毅然不為利疚不為勢詘
蘄於必行其志然則龔黃為馮侯之所易馮侯為龔黃
之所難烏可比哉衆皆諱然稱善則相率請為文以頌
侯德頌曰

慕爾暨陽附庸於越生齒滋衆在今為劇帝披輿圖命
陟而州擇賢守臣得今馮侯侯自西來羸馬弊衣邦人
環觀且喜且疑侯始為政循循于于惟姦是屏惟弱是
扶罔俾苞苴累我名節爾永雖清我行惟潔堂堂乾坤
如侯幾人天寶遺侯惠我邦民邦民懽呼更相告語始
疑今信侯我父母昔侯未來骨肉流亡侯既來止爾農
爾商帝憫下人病於荐饑水利田功乃懋乃司帝曰咨
汝往貳其政侯拜稽首臣翼唯命我民有言侯毋疾驅

天子有詔侯不敷徐世無陽秋孰祀侯德百世不礪視
我茲刻

贊

魯齋先生畫像贊

王磐

氣和而志剛外圓而內方隨時屈伸與道翱翔或躬耕
太行之麓或判事巾書之堂布褐蓬茅不為荒涼珪組
軒冕不為輝光虛舟江湖晴雲卷舒上友千古誰與為
徒管幼安王彥方元魯山陽道州蓋異世而同符者也

書畫像自警

劉因

所以承先世之統者如是其孤所以當衆人之望者如是其虛嗚呼危乎不有以持之其何以居

王允中真贊

劉因

齒未老鬢胡為而白耶隱然含四海之憂鬢雖衰顏胡為而壯耶凜然橫千仞之秋竹石丹心砥柱中流百折而必東寸折而不柔其履危犯險幾禍一身然視循默苟容貽害當世者不優耶

質齋贊

蕭 軒

國子助教祁君子京以質名齋自為記且銘之一時宗
工秀人題詠盡其義矣齋人蕭軒掇其遺而為贊曰

上古聖神仰觀俯察旁及鳥獸取象維八書契干戈登
降挫耨化成之具於焉以茁巍乎煥乎重華位陟文命
誕敷懋昭大德視民如傷于湯有光姬情孔思謨訓洋
洋經緯三極時維至文世變風移覆其質云世之謂文
古所無有游夏言行昭昭可考絺章繪句錦心繡口充

棟汗牛世用冒取蔽天之明堂人之靈繇政迄廣既斯
以成卓哉祁君矜世之病質以自居求盡其性如彼流
泉載浚厥源彼華彼實載殖厥根如賁尚白循循勿勿
立德立言成已成物

晦庵先生畫像贊

吳 澂

理義密微蠶絲牛毛心胃恢廓海闊天高豪傑之才聖
賢之學景星慶雲泰山喬岳

臨川野老自贊

吳 澂

身形瘦削春林獨鶴眼睛閃爍秋霄一鶚遠絕塵滓大同寥廓自鳴自和自歌自樂

李秦公畫像贊

程鉅夫

厯觀宰輔久無儒者潛龍羽翼公乃大雅帝曰舊學汝遂相予真儒之效此其權輿熙運方開明良喜起如龍如雲如魚如水任以天下可謂大臣勞謙得士清靜寧民想其風采金玉珪璧賜之畫圖式是百辟豈惟丹青盛德形容尚友凌烟黃閣清風

臨川吳先生畫像贊

虞集

業廣而精德周而尊釐析羣言以究斯文章甫立端書
冊左右愷悌君子天錫眉壽

西夏相幹公畫像贊

虞集

公姓幹氏其先靈武人從夏主遷興州世掌夏國史公
諱道冲字宗聖八歲以尚書中童子舉長通五經為舊漢
教授譯論語註別作解義二十卷曰論語小義又作周
易卜筮斷以其國字書之行於國中至今存焉官至其

國之中書宰相而歿夏人嘗尊孔子為至聖文宣帝是以畫公像列諸從祀其國郡縣之學率是行之夏亡郡縣廢於兵廟學盡壞獨甘州僅存其迹興州有帝廟門牓及夏主靈芝歌石刻涼州有殿及廡至元間公之曾孫雲南廉訪使道明奉詔使涼州見殿廡有公從祀遺象欬歔流涕不能去求工入摹而藏諸家延祐間荆王修廟學盡撤其舊而新之所象亡矣廉訪之孫奎章閣典籤王倫都嘗以禮記舉進士從予成均於閣下又為

僚焉間來告曰昔故國崇尚文治先中書與有功焉國中從祀廟學之象僅存於兵火之餘而泯墜於今日不亦悲乎先世至元所募象固無恙也願有述焉以貽我後人乃為錄其事而述贊曰

西夏之盛禮事孔子極其尊親以帝廟祀乃有儒臣早究典謨通經同文教其國都遂相其君作服施采顧瞻學宮遺象斯在國廢時遠人鮮克知壞宮改作不聞金絲不忘其親在賢孫子載圖丹青取徵良史

自贊畫像

虞集

邈乎千載之下而謂古今一時也眇乎五尺之軀而謂
天地一體也廓乎不自知其所知也歆乎未能至其所
至也倪乎若憂非有傷乎其內也泊乎若休無所待乎
其外也服今日之服食今日之食同乎今之人聊以順
吾際也讀古人之書頌古人之詩思夫古之人不知老
之至也

大象圖贊

虞集

皇帝畫大象圖賜皇太子監察御史前典寶少監臣某
承命裝潢而寶藏之翰林直學士臣集再拜稽首而作
贊曰

有偉馴象至自南域絳革鏤錫路車是服維皇在輿游
目於式任重持安牕力知德燕閒以思寫之几格天章
龍文臻妙造極嗟爾微勞尚輶宸臆師武臣能有不察
識若稽包犧受圖布畫遠取不遺以洛神易擬茲形容
克配古昔臣用述贊與世作則

橐佗圖贊

虞集

皇武肇迹宛宛龍漠不居其康輯乘為郭有服維佗礪
肉載嶠毳旃帷房偉輓輦鞞輶輶千里載泉于橐黃頭
羔裘騎引顧却人習見聞聖獨有作深宮穆清思詔勒
竹手著厥初伊勞匪樂公劉績稷于邦式廓裏糧啓行
致祚八百史臣作雅稽古允若

靜修劉先生畫像贊

歐陽玄

微點之狂而有沂上風雲之樂資由之勇而無北鄙鼓

瑟之聲於裕皇之仁而見不可留之四皓以世祖之略而遇不能致之兩生嗚呼麒麟鳳凰固宇內之不常有也然而一見而六典作一出而春秋成則其志不欲遺世而獨往也明矣亦將從周公孔子之後為往聖繼絕學為來世開太平者耶

默庵安先生畫像贊

歐陽玄

寤寐乎明善誠身之書步趨乎格物致知之學闢西三
鱣未必榮於教授之四世苟陵八龍奚以過於伯仲之

一壑豈非白茅重而忠信著玄酒醇而嗜慾薄者乎鍾
期伯牙有同世而不相遇者吾故於默庵之神交而益
以重容城之先覺也

威如蘇先生畫像贊

歐陽玄

英英紫芝皎皎素絲冥搜遠討默識近思子雲精潔季
海孝友德人之容君子之守

郎中蘇公畫像贊

歐陽玄

維子寧父為名卿士其心塞淵如古君子既合於古詎

諧於時職是正直弗究厥施居家嚆嚆在國諤諤屹如
長松矯如一鶚蚤以讜言屢忤權相晚著惠愛足食邊
饒剛者必仁仁必有後宜爾有子簡自造秀遺像儼然
不亡者存九原可作孰敢吏雲

潘雲谷墨贊

李 洞

徂徠松雲貯玄谷道人屋中抱其獨琅琅空山萬杵熟
道人曄然開電目松雲化石石化玉崢嶸寶氣星漢燭
貢之奎章月在續龍光淋漓九宇福

李節婦馮靜君贊

王士熙

古之稱節婦人者不特織紵組紃而已良人不夭未亡殆
存出生氣於寒灰之中死者得安生者已傳其家嗚呼
馮氏百世猶誇

元文類卷十八

欽定四庫全書薈要卷二萬一百二

元文類卷十九

元 蘇天爵 編

碑文

國子學先師廟碑

程鉅夫

皇慶二年春皇帝若曰我元脩百聖之統建萬民之極
誕受厥命作之君師世祖混一區宇亟修文教成宗建
廟學武宗追尊孔子所以崇化育材也朕纂丕圖監前

人成憲期底於治可樹碑於廟詞臣文之臣鉅夫拜手
稽首奉詔言曰臣聞遠古之初惟民生厚風氣漸靡聖
人憂之越有庠序學校之制天下之治胥此焉出中統
二年以儒臣許衡為國子祭酒選朝臣子弟克弟子員
至元四年作都城畫地宮城之東為廟學基廿四年備
置監學宮元貞元年詔立先聖廟久未集大德三年春
丞相臣哈喇哈斯達爾罕大懼無以祇德意乃身任之
飭五材鳩衆工責成工部郎中臣賈馴心計指授晨夕

匪懈工師用勸十年秋廟成謀樹國子學御史臺臣復
以為請制可至大元年冬學成廟度地頃之半殿四阿
崇尺六十有五廣倍之深視崇之尺加十焉配享有位
從祀有列重門修廊齋廬庖庫為楹四百七十有八學
在廟西北遜於廟者十之二中國子監東西六館自堂
徂門環列鱗比通教養之區為間百六十有七制加孔
子大成之號祠以太牢贊釋奠雅樂江南復戶四十隸
之春秋二祀先期必命大臣攝事皇帝御極陞先儒周

敦頤程顥程頤司馬光張載邵雍朱熹張栻呂祖謙許衡
從祀廣弟子員三百進庶民子弟之俊秀相觀而善業
精行成者歲舉從政又詔天下三歲一大比興賢能於
是崇宇陞陸陳器服冕聖師巍然如在其上教有業息
有居親師樂友諸生各安其學咸曰大哉天子之仁至
哉相臣之賢工曹之勤其知政治之本原矣臣竊謂天
地至神非風雨霜露罔成其功斯道至大非聖君賢相
罔致其化人性至善非詩書禮樂罔就其器列聖相承

謂天下可以武定不可以武治所以尊夫子建辟雍復
科舉誠欲人人被服儒行為天下國家用耳然則黎民
於變時雍顧不在茲乎於戲隆哉臣鉅夫謹拜手稽首
而獻頌曰

皇元受命誕惟作京以撫萬邦既訖武功載修文教登
其俊良於穆宣聖垂範罔極首尊而彰曰爾胄子弟典
於學曷風四方學以聚之廩之餼之日就月將大德嗣
服迺建孔廟迺經辟雍考制程財審時相宜適成厥功

辟雍洋洋冕服皇皇羣士景從聖道既明渙號既加我
皇御天執道之中軌物牖民翼翼乾乾帝學益弘庶政
惟和我化用宣躋祀儒師賓興羣材丕紹厥先相古盛
時訐謏遠猷罔不由賢天錫皇祖神聖文武以有萬國
威何不加令何不行何求不獲惟學是務惟材是育下
民允迪越厥左右咸有一德以匡乃辟維帝時憲惟臣
克念濟濟茂碩禮明樂備永作神主播頌無斁

曲阜孔子廟碑

閻復

聖上嗣服之初述祖考之成訓興學養士嚴祀先聖自
曲阜始制詔若曰孔子之道垂憲萬世有國家者所當
崇奉中外聞之咸曰大哉王言拭目太平文明之治粵
明年元貞改元先聖五十三代孫密州尹治入朝璽書
錫命中議大夫襲封衍聖公月俸百千秩視四品孔氏
世爵弗傳者久至是乃復申命有司制考辟雍作廟於
京師由是四方嚮風宗建廟學惟恐居後闕里祠宇燬
於金季之亂閣號奎文若大中門闔存者無幾右轄嚴

公忠齊保魯嘗假清臺頒歷錢佐營繕之費歲戊申始復鄆國後寢以寓先聖顏孟十哲像至元丁卯衍聖公治尹曲阜主祀事將圖起廢奎文杏壇齋廳黌舍即其舊而新之禮殿則未遑也國初封建宗室畫濟兗單三州為魯國大長公主駙馬濟寧王分地置濟寧總管府屬縣十六曲阜其一也濟寧守臣按檀不華恭承詔旨會府尹僚佐鄉長者謀曰方今聖天子守成尚文此鄉威化之源禮義之所從出為守臣者敢不對揚休命以

廟役為任首出泉幣萬緡衆翕然助之傭工願力市水
於河輦石於山掄材於野烹揀櫨楠楹礎之屬悉具又
得泗水渠堰積石數百石壘稱是露階紺砌咸足用焉
郡政之暇躬為督視甄陶鍛冶丹雘髹漆以至工師廩
積各有司存經始於大德二年之春屬歲祲中止藏事
於五年之秋不期月而告成殿廡重簷亢以層基繚以
修廊大成有門七十二賢有廡泗沂二公有位黼座既
遷更塑鄆國像於後寢締構堅貞規模壯麗大小以楹

計者百二十有六資用以緡計者十萬有奇落成之日
遠近助祭者衣冠輻湊衆庶瞻顙千禩祖庭頓還舊觀
於是衍聖公治遣其子曲阜令思誠奉表以聞且以廟
碑為請會選胄子入學擢思誠國子監丞特勅中書賜
田五千畝以供粢盛復戶二十八以應洒掃仍下翰林
書其事於石臣復承命踴躍既述興造始末竊惟聖人
之道與天地並參聖人之祀與天地無極堯舜湯文之君
不作而道在洙泗立言垂教推明堯舜湯文致治之由

模範百王仁及天下後世願治之主莫不宗之廟貌相望
遠乎四海聖人之道固無係於祀禮之隆殺夫尊其道
而必其祀蓋治古之恒規王政之所先也洪惟聖元神
武造邦天兵傳汴戎事方殷不忘存敬先聖之祀詔求
五十一代孫行聖公元措歸魯哀集奉常禮樂於兵燼
之餘燕翼之謀肇於此矣世祖聖德神功文武皇帝仁
霑義洽九域混同文物煥然可觀內立國學外置郡邑
學官而於先聖之後尤所注意遴選師儒訓迪作成需

賢以嗣封爵茲志未究皇上續而成之故自紹膺景命
以敦化厲俗爲先務至於博施濟衆敷文來遠哀矜庶
獄惠鮮鰥寡由天縱之聖見於設施皆堯舜湯武之舉
揆諸聖經之言若合符契用能張皇教本光昭先業以
致魯國臣民思樂泮水如附靈臺子來之衆至矣哉觀
文化下必世後仁之效豈特震曜一時寔宗社無疆之
福也銘曰

道之大原實出於天天何言哉乃以聖傳傳道維何唐

虞三代儀範百王萬世永賴聖人之功與天比隆聖人之祀垂之無窮皇元肇基撥亂右武天兵趨汴周禮在魯烝哉世皇載整乾綱始定終綏遂臣萬方肅肅魯庭嗣封有典德音孔昭聖謨丕顯王者之作必世後仁繼序不忘成於孝孫遙觀厥成是訓是則思樂泮水作廟翼翼如矢斯棘如暈斯飛邊豆靜嘉陟降有儀記事孔嚴世爵以延汎掃有戶棗盛有田聖政聿新希蹤治古僉曰皇明登三咸五泰山巖巖聖祀綿綿與國無疆於

萬斯年

襄陽廟學碑

姚燧

聖元為制凡士其名而儒其服不糝之民而殊其籍惟
責田租商征自外身庸戶調皆復之無有所與者將百
年於此矣世祖詔即闕里聚孔顏孟三族置官而教之
以俟其成德達材者垂三紀焉是皆無聞歷古而獨見
之今者也陛下恢前皇之遠猷舉厥未修之典封衍聖
公屢下明詔還正貢莊學田俾完廟養老資廩師生其

於世聖人之曹學聖人之徒覆毓漸濡德澤至矣府州
縣邑為之牧守令長者率以作新廟學為政務先而恐
風行聖化之後也襄陽宋之鄆城也金社既墟嘗歸吾
元由於忽棄不戍故宋竊築為荆北門殆四十年世祖
徵兵天下不忍徵利一旦以聞吾民包峴漢而城之視
猶圉虎待其自斃五年廼下則其受大兵也為最久城
門闢矣廟學前大閫帥武臣因陋就簡而為之不稱神
居勢宜改為田之在郊籍既失存民亦廢耕主吏去之

無有知其所在所不敢視江南他州之有夙儲者其施力
又若甚艱此前政所以苟於其事者惟總管陳衍經度
之已而受更今總管陳義謀之吏民曰明詔如是吾方
表田募民覲獲何時明日使是學魏德他州則二千石
為不職且受譴矣不衆為之就緒無日更此者割若俸
戶此者捐若財應者謹然辭出若一帥守兵家亦勸赴
功猶不足用取餘公帑治之二年聖哲中殿賢儒傍序
門堂齋庖楹礎林立朔望春秋奠薦講肄籩豆鐘鼓有

踐與節人之戾止新視易聽起所墮習而祇畏矣燧曾
過焉拜其下庭猶有可憾焉者自唐開元配食顏子拔
曾子於諸子以足十哲前宋則躋孟子與顏氏並雖金
百年未之或改後宋則益以曾子子思進子張於曾子
之舊故江之南位十哲上亞聖人者四焉宋北平北方
學者安顏孟而異曾思浙憲首請黜之當國之臣不然
之也其後一侯為憲河南是時襄陽未入山南猶其所
莅也不請而遂黜之由是是廟配止顏孟自今以觀顏

曾之於夫子同見而知伯魚前死則子思亦見而知者
惟孟子後百有餘歲為聞而知子思學曾子孟子學子
思而得其道統之傳則曾思之功果不優於孟氏乎顏
氏前死有聖人者存未嘗為書質之於經事十九見贊
夫子者纔一問仁與為邦二焉一以脩己一以治人他
皆見稱於夫子與不待為問而自謂之者也曾子述孝
經大學子思作中庸孟子則自著七篇之書學者賴之
至今為書三子二子獨見黜是外其師而弟子是尊於

聞而知者仍祀不變而顧後所見而知者焉皆不知為
何說也或曰子記汴學已譏立顏路曾皙伯魚於序而
坐三子堂上今何云然燧曰嚮所疑者以崇子而抑父
弗安順於倫理非曰可併去之也今江南已配享者可
不講而黜之則江之北有有功曾思者可不請而配享
乎燧故嘗曰人臣有見列而上之則可若制度考文之
事天子司之以幸國家遑於稽古之事雖天下學禮之
臣羣然議之必得所當義者而後可也俟磐石求銘奉

議大夫山南江北道肅政廉訪副使馬公昫分刺是郡
亦以燧嘗勤心宜若可言燧曰嗚呼是豈可易為哉孟
子稱智足以知聖人者宰我子貢有若子貢有若以為
自生民以來未有宰我以為賢堯舜遠猶未曉言聖人
之所由以然孔子語堯曰蕩蕩乎民無能名焉則遠堯
舜者益難名矣然自孔子沒訖漢之世將八百年廟焉
而不碑其見之金石者孝桓元嘉許魯相瑛置百石吏
領禮器與孝靈元興魯相晨奏依社稷出穀王家供裡

祀二詔魏曹植始碑之唐則作廟一州必碑最盛以衆
就其善言者韓愈氏處州柳宗元柳州道州曰自天子
至於郡邑通祀遍天下惟社稷與孔子又曰仲尼之道
與王化遠邇二帝三王無以侔大不敢一言以贊其道
無他蓋聖人之道天也善言者繪工也於山水鳥獸草
木之為物與人執事或可圖而肖之以語繪天設色而
得其髣髴萬一者古今人無能為者也故惟著其始媿
而今完者以告夫後之人銘曰維襄形勢始終一地視

時屯亨而為險易昔焉畫守負而江山動天下兵五稔
悖頑時匪無學士日介胄以扞大刑遑事俎豆皇輿既
邈壇南海涯顧為土中襟帶安施猶為名城於漢之域
惟廟弊軋不稱瞻武帝奮文教誕告優優于學須才如
獲仰攬是邦承流其陳兩侯衍也經畫義逮成績桓桓
新宮實教所基嗟哉襄士佻達何為聖人遺言具在方
冊口誦心維奚異親炙朝趨斯庭夕休斯廬亦奚以間
闕里即居行見接武賓興成德作之君師實帝之力刻

詩麗牲用示無極

大興府學孔子廟碑

馬祖常

昔我太祖皇帝受命造邦金人孫于汴太祖即以金燕
開大藩府制臨中夏維時已有定都之志矣故太宗皇
帝首詔國子通華言乃俾貴臣子弟十八人先入就學
城新剏於兵學官攝於老氏之徒迨世祖皇帝敕命下
始正儒師復學官廟祀孔子歸壩垣四侵地勒石具文
作新士子至元二十四年既城今都立國子學位於國

左又因故廟為京學京師雜五方俗尹治日不給廟之
墻屋弊壞將壓以毀講席之堂粗完泰定三年今大尹
曹侯上視廟貌祠位皆不如制割稍入為寮窠倡然後
大家富人合貲以聚財者有焉釋子方士分食以庀徒
者有焉施施于于咸樂相成延兩廡五十有二楹締構塗
飾工良物辦象從祀諸賢百有五人妥靈惟肖威儀有
容又懇請於朝得廩餼弟子員百人受學於師復其身
不勞以事於是天下首善之教興焉廟肇自唐咸通中

至遼金燕為都邑故嘗用天子學制選舉升造與南國
角立亦一時之盛也太宗皇帝當雲雷經綸之世聖訓
諄切以德賞喻父師以擯楚懲子弟饑焉粟肉渴焉酒
醴力焉僕使恩義甚備其養賢勸善之誠固已高出於
百王之上矣世祖皇帝立極作則人文昭明登用儒臣
躬親講學故當時勲賢之裔以及宿衛之臣罔不以揖
讓俎豆之為懿顯蒙昏庸之為耻也而三代國學黨序
遂庠家塾之等秩然羅列於上下才學經術用世之士

踵武而出暨仁宗皇帝賓興大比四方舉進士凡登賢
書策名禮部者京師屢倍於外郡非列聖仁涵義揉百
年之禮樂文物推而致之歟燕自虞夏為武衛之服召
公之化尚矣昭王築臺以徠賢士鄒衍樂毅劇辛至有
稱於世韓嬰以詩易為一家師孔穎達博綜五經卓然
庶幾醇儒今多士游歌在庭摠衣在廟將見魯鄒之美
矣若嬰穎達宜所不道矧衍毅辛之徒哉夫儒者之學
詩書六藝之文以至施天下之道無有二也後世教不

明家異人殊各溺於所習以相詆訾由上之教無以一
之嗟乎古者小學大學之師弟子之傳皆本於道德仁
義之實著於詩書六藝之文非有教有授則不敢以傳
也傳焉而龐雜不經則上有刑也是故風淳而氣同由
上之教有以一之也而王國多士逢文明之會肄業有
學學有師春秋祀其先聖先師者又有廟有位入有食
以處出有貴於衆所以報稱列聖教化之德而應賢侯
承宣之志者必冠而起矣提舉學事崔居中教授賈良

弼正張禎祿司視以狀請曰廟之事成前尹瑪蘇庫實
能治之今尹曹偉實能終之經歷王孝祖薛讓警巡監
院烏德美使李權且能考工於下也余既為言正克郎
沂鄒四公配食東鄉位其來請遂為銘詩不辭詩曰

皇元有赫奄受大國于月之崦于日之城京邑翼翼莫
不來極予誕敷文德新都有嵯辟雍嵯嵯璦弁之璦濟
爾象犧鐫爾弦歌新宮則那舊廟如之何皇帝在御百
度咸樂海輸維柁河浮厥柏是尋是斲庶庠嶽嶽式光

我上國立聖儀儀立統龍衣衎我先師既右享之采萍
于池薦此明犧用介我蕃釐蕃釐伊何彼美多士克明
克類克諒厥事以登臚仕以媚於天子有鏗華鐘路鼓
逢逢言燕于公有翼有顥多士既同天府是庸維曹侯
之功曹侯閭閭廼承廼宣御劇廼專虞庠連連王士安
安祇國維賢天子萬年

光州孔子新廟碑

馬祖常

光州既新作孔子廟乃以圖來徵文於州人馬祖常曰

爾先子爲政於此州州有學以教人有田以養士有廟以祀先聖先師矣今久圯不治廟四出無垣登降無階肖象之設五采之服不彰安靈之位不嚴配侑之序不飾室屋構櫨周廡重門及籩豆禮器之類一切弊舊取其假備歲春秋釋奠官及屬師及弟子致齋無次某等一二人辱守茲土割其稍入合民之錢粟箴木陶瓦木材陶良以錢庀工以粟傭力丹漆黝堊鍍銅施色之物皆集作於天歷二年七月九日成於至順元年八月十

有八日凡廟位象設稱乎南面而爲王者之居昔之不
治者今皆治矣昔之無有者今皆有矣爾先子爲政於
此州爾又以文名於時爾宜爲文告來者庶謹之而毋
毀也祖常三爲典禮之官習於先王之禮而學於聖人
之徒陳跡往轍不敢煩州人之聽獨以我朝有道之世
告吾州人始憲宗皇帝都和寧遣國子二十人就學今
都之南城孔子廟旁旨意訓誨刻載廟中世祖皇帝潛
王邸召學士王鶚因幄中設主陳俎豆觀祭孔子儀武

宗皇帝詔天下若曰世嘗知尊孔子矣而皆未至也其

進封至聖文宣王孔子爲大成至聖文宣王今皇帝正

位制若曰孔子大聖推本父母未極褒崇父叔梁紇可

封啓聖王母顏氏可封啓聖王夫人命以璽書告闕里

廟庭猗歟盛哉夫天下旣富而教興焉興教必於學學

必有所師師莫若聖聖莫若孔子則廟而事之者學者

宜莫先焉且旣富而教雖三王之治未有不富而能教

者吾州介江淮之交生殖甚寡然少長安於樸俗衣服

飲食給於田蠶弋釣之力工商給於粗完男女婚嫁養生送死質而有節其人已幾於淳厚故易富而易教弗如他州之人必待厚藏而後富近刑而後教也是以見其州大夫賢欲有所興起於善而又應之速也如此誣天下以難治者豈君子哉國家以文化成四海考郡縣之績當以吾州爲首焉茲序其實而又繫之以詩俾州人誦新廟之成而不忘州大夫之德也詩曰

於穆聖師降我新廟
几筵維飾象設維肖
四簷周廟載

基載築雅雅麟麟靈御之肅靈御之肅衣裳我人俾不
爲羣而即於倫埏埴萬類同仁於天匪言莫宣匪文莫
傳六藝百家咸質於經我維受之日化於成大帝在位
翁以敷施考妣啓聖而追王之四海作則文明貽我
州易教作廟維喬梗桮梓栢弗雕而斷陶瓦髹漆施色
丹渥麗牲在門春秋燭吉官屬師徒端弁以入其容鏘
鏘其神洋洋牖茲顓蒙闇而日章淮嶽諸谷會流爲漢
南薄其郢州名爲光光在百城瘠土寡殖維人易教衣

食耕織則旣衣食又學爲士學士有師先聖是祠州侯
德勸我民豈忘之

真定路先聖廟碑

富珠哩种

初鎮州置真定路以中山冀晉趙深蠡府一州五土地
人民奉我睿宗仁聖景襄皇帝顯懿莊聖皇后湯沐首
務立學養士當是時也世祖聖德神功文武皇帝淵潛
胡庭聞鎮之學緩未即叙龍集丁未初有司勿怠其事
於是以金粟岡廟址崇殿廡闢黌舍太原元好問有記

越十有四年庚申世皇帝即祚都燕統一八表置憲肅郡
府鎮憲爲諸道之冠庠序闕略必憲人府人胥議興治
至元暨今雖屢加葺猶有未備至順辛未憲暨府議倡
集楮幣三萬市物傭工募役自殿之廡自廡之門新其
屋楹三十有二棟宇軒楯拱挾環合左右翔峙作杏壇
於殿之北神廚於廟之東自廟徂學門垣桎杌循序森
列瓦墁締築堅麗於舊先是府尹瑪蘇庫已基未構而
去政人遷易者十餘年尹張穆爾台倅和則平治中和

允升繼至憲使托歡提其綱賓佐韓復理其目始克有
濟其年夏告成壬申春府遣吏李明善介徵士瞻思狀
來請志其績邠嘗貳憲燕南義不容讓稽宋蔡京遷學
陸佃記略曰真定雖塞北有江南之勝江南豪傑特起
如臨川王公與孟軻相上下真定初未有聞噫是何言
之怪也真定者冀州東垣堯舊封也昔帝堯以帝嚳子
侯恒山之唐自唐侯即天子位徙山之西號閭唐氏太
行東西境數千里皆帝之圻真定固神明之宅也孔子


經法於易則溯伏羲以本無言書則始唐虞以道政事
詩則采殷周以正性情春秋則黜五霸以嚴名分禮樂
升降以鑑窪隆天人之道至矣迺曰惟天爲大惟堯則
之唐韓愈謂堯以道傳舜禹湯文武周公孔子孟軻蓋
孔氏立教如帝典微言如三謨帝堯孔子位不同而同
聖王安石背道迷經蒙君誤國京師傾黨滋熾世益大
壞河南程氏兄弟承先聖之緒捄之終賴其言道不墜
地建安朱氏師則兩程裒輯遺言貫通折衷以悟百世

先正許文正公見其書神感明會相我世皇同符堯舜
世道人心翕然大正洙泗淵源日月昭朗令神聖繼興
世日趨治鎮股肱郡也帝堯之思在焉朝廷之化先焉
崇事先聖所以敬也鎮士知所鄉往下學上達尊經慎
藝何德不進何業不修何邪不鑑何古不及憲牧之輔
治教縉紳之報君父於是乎在廼賦詩以慰鎮人士曰
太行之山潞池之水孰古與美陶唐之里潞池之潞太
行之所孰令與伍皇祖之土恒山嶙嶙潞水沄沄昊天

生民思堯之仁淳水湯湯恒山蒼蒼帝堯相望於赫世
皇始鎮之府時未忘武維士與女澤沐時雨龍德出潛
萬方既瞻春熙秋嚴自北而南皇風斯扇時雍於變視
彼侯甸恒鎮之先大殿周廡先聖之宇久未令覩誰敢
予侮有廟有庭有戶有局肅肅其凝昭昭其靈新是鎮
學式對恒嶽惟士也確順我先覺求門於墻求室於堂
伊洛考亭使我不育惟聖之玄惟王之素園冠方履天
地之度侃侃闔闔天天申申如目之眴如躬之親既嚴

既翼臨汝明德以賓皇國方州是則鎮人聚喜歸功憲
紀憲人曰止其誰敢爾顒望神京稽首奉揚配天無疆
天子之光

元文類卷十九



總校官候補中允臣王燕緒

校對官編修臣許兆椿

膳錄監生臣應先烈